

**Y Pwyllgor Deddfwriaeth,
Cyfiawnder a'r Cyfansoddiad**

**Legislation, Justice and
Constitution Committee**

Senedd Cymru

Bae Caerdydd, Caerdydd, CF99 1SN
SeneddDCC@senedd.cymru
senedd.cymru/SeneddDCC
0300 200 6565

Welsh Parliament

Cardiff Bay, Cardiff, CF99 1SN
SeneddLJC@senedd.wales
senedd.wales/SeneddLJC
0300 200 6565

Mick Antoniw AS

Y Cwnsler Cyffredinol a Gweinidog y Cyfansoddiad

24 Gorffennaf 2023

Annwyl Mick,

Y Pwyllgor Deddfwriaeth, Cyfiawnder a'r Cyfansoddiad, 10 Gorffennaf 2023

Diolch eto am ddod i'n cyfarfod ar 10 Gorffennaf 2023. Rydym yn ddiolchgar am yr amser rydych yn ei roi yn rheolaidd i'r Pwyllgor.

Fel y nodwyd ar ddiwedd y cyfarfod, mae nifer o gwestiynau yr oeddem yn awyddus i'w gofyn i chi ond nid oedd digon o amser ar eu cyfer. Hefyd, hoffem holi cwestiynau dilynol ar nifer o faterion a drafodwyd yn ystod y cyfarfod. Felly, byddem yn croesawu cael ymateb i'r cwestiynau yn yr Atodiad erbyn 1 Medi 2023.

Fe wnaethoch chi a'ch swyddogion hefyd ymrwymo i roi gwybodaeth i ni am garcharorion (Cofnod y Trafodion, paragraffau 141 a 142) a chopi o lythyr am Filiau'r DU sy'n peri pryder y gofynnir/gofynnwyd am gydsyniad amdanynt (Cofnod y Trafodion, paragraffau 187 a 190-191). Edrychwn ymlaen at gael y wybodaeth hon maes o law.

Yn gywir,

Huw Irranca-Davies

Huw Irranca-Davies

Cadeirydd



**Senedd Cymru
Welsh Parliament**

ATODIAD

Cwestiwn 1: Sut y bydd y Senedd yn gallu craffu ar y gwaith y mae'r Fonesig Vera Baird yn ei wneud fel cynghorydd arbenigol annibynnol ar ddatganoli cyfiawnder?

Cwestiwn 2: Roedd eich sylwadau yn ystod y cyfarfod yn awgrymu na ellir defnyddio'r broses datrys anghydfodau rhynglywodraethol mewn perthynas â Biliau unigol y DU sy'n gwneud darpariaeth mewn meysydd datganoledig oherwydd yr amserlenni sy'n gysylltiedig â Biliau o'r fath yn pasio drwy Senedd y DU. A yw hynny'n gywir? Os felly, sut y gellid datrys anghydfodau sy'n ymwneud â Biliau'r DU? Os na fydd anghydfodau'n cael eu datrys, pa effaith mae hyn yn ei chael ar y gyfraith a wneir i ddinasyddion Cymru mewn meysydd datganoledig?

Cwestiwn 3: Pa mor bryderus ydych chi fod y defnydd cynyddol o Filiau'r DU i wneud darpariaeth (sylweddol ar adegau) mewn meysydd datganoledig yn gwthio i'r cyrion y cyfleoedd i'r cyhoedd a rhanddeiliaid yng Nghymru ymgysylltu â'r broses o wneud y gyfraith honno o ystyried y gweithdrefnau gwahanol sy'n bodoli rhwng y Senedd a Senedd y DU?

Cwestiwn 4: Sut ydych chi'n monitro pa gynigion deddfwriaethol mewn rhannau eraill o'r DU a allai gael effaith ar gyfraith Cymru o ganlyniad i Ddeddf Marchnad Fewnol y DU 2020? A ydych yn ymwybodol o unrhyw gynigion a allai gael effaith yn y dyfodol agos?

Cwestiwn 5: Pa asesiad y mae Llywodraeth Cymru wedi'i wneud o sut y gallai cynlluniau a gyhoeddwyd yn ddiweddar i gyflwyno cyfyngiadau ar werthu cynhyrchion sy'n cynnwys llawer o fraster, siwgr a halen gael eu heffeithio gan egwyddorion mynediad i'r farchnad Deddf Marchnad Fewnol y DU?

Cwestiwn 6: Yn eich datganiad ar 1 Gorffennaf mewn perthynas â Biliau y DU yn cael eu pasio heb gydsyniad y Senedd, gwnaethoch chi ddweud: "Dydy'r setliad datganoli erioed wedi bod dan gymaint o straen â hyn yn ystod yr holl amser ers ei sefydlu, 24 mlynedd yn ôl". A allwch chi nodi pam eich bod yn credu bod hyn yn wir a pha gamau y mae Llywodraeth Cymru yn eu cymryd mewn ymateb?

Cwestiwn 7: Ym [mis Ionawr eleni](#) gwnaethoch chi ddweud wrthym nad oeddech yn gwybod am unrhyw amgylchiad ble y gofynnodd Llywodraeth Cymru i Lywodraeth y DU ddeddfu ar ei rhan. Ers hynny rydym wedi cael gwybod bod Llywodraeth Cymru wedi gofyn am gael ei chynnwys ym Mil Ardrethu Annomestig Llywodraeth y DU. A allwch chi egluro'n fanwl:

- y broses sydd ynghlwm â defnyddio Bil y DU mewn amgylchiadau lle mae cytundeb eang i wneud hynny: pryd fydd y trafodaethau'n dechrau, pwy sy'n eu cychwyn, beth yw'r amserlenni, y broses ar gyfer cytuno ar welliannau ac ati.
- y prosesau cymeradwyo'n derfynol yng Nghabinet Llywodraeth Cymru ar gyfer defnyddio Biliau y DU drwy gydol eu hynt drwy Senedd y DU.

Cwestiwn 8: Wrth inni ystyried y memoranda cydsyniad deddfwriaethol ar y Bil Ardrethu Annomestig, gwnaethom nodi bod y Bil yn cael ei ddefnyddio i newid gweithdrefn graffu ar gyfer pŵer dirprwyedig a gymeradwywyd gan y Senedd ei hun ddwy flynedd yn unig yn ôl yn ystod hynt y Bil Llywodraeth Leol ac Etholiadau (Cymru) (Deddf 2021 erbyn hyn). A oes modd i chi roi eich barn ar ddefnyddio Biliau'r DU i wneud newidiadau i weithdrefnau craffu y cytunwyd arnynt yn neddfwriaeth y Senedd, a pha mor briodol yw'r dull hwn yn eich barn chi?

Cwestiwn 9: Mae'n ymddangos bod Llywodraeth Cymru yn dibynnu ar y weithdrefn 'cywiro cyn gwneud' yn fwyfwy aml wrth gywiro gwallau mewn is-ddeddfwriaeth. Pwy o fewn Llywodraeth Cymru, yn swyddogion neu yn Weinidogion, sy'n penderfynu a yw gwall mewn offeryn cadarnhaol drafft yn ddigon mân i'w gywiro cyn i'r offeryn gael ei lofnodi?

Cwestiwn 10: Pa feini prawf y mae Llywodraeth Cymru yn eu defnyddio, y tu hwnt i'r rhai a nodir mewn Ymarfer Offeryn Statudol, wrth ystyried a yw camgymeriad mewn is-ddeddfwriaeth ddwyieithog yn fân ac nad yw'n berthnasol?

Cwestiwn 11: A yw Gweinidogion Cymru yn ystyried materion sy'n ymwneud â hygyrchedd cyfraith Cymru cyn cydsynio i Lywodraeth y DU wneud is-ddeddfwriaeth mewn meysydd datganoledig? Os felly, pa feini prawf sy'n cael eu defnyddio i wneud asesiad?

Cwestiwn 12: A allwch roi'r wybodaeth ddiweddaraf am gynlluniau Llywodraeth Cymru ar gyfer Bil Diddymiadau Statud?

Cwestiwn 13: Nododd y Prif Weinidog yn ei ddatganiad ar y Rhaglen Ddeddfwriaethol y byddai Llywodraeth Cymru yn cyflwyno Bil cydgrynhoi ar gynllunio. A allwch roi'r wybodaeth ddiweddaraf inni ynghylch pryd y bydd y Bil hwnnw'n cael ei gyflwyno i'r Senedd?